

Hei!

Eg vil gjerne koma med eit svar på høyringa til vindkraftutbygging på land.

Eg er frå Masfjorden kommune og frå meg er det klart NEI TAKK til vindkraftutbygging både i Masfjorden og nabokommunane som deler fjella med oss.

Det er heilt klart mange som har sendt inn talmateriale. Så eg vil heller fokusera på kva naturen betyr for meg.

Eg har vakse opp i Masfjorden, og difor òg i naturen. Denne barndomen i naturlege omgjevnadar, med utallege turar i skog og mark, fjell og dal, har vore med på å forma meg som menneske. Det har fått meg til å forstå at det er noko som er større enn meg. Noko som eg har eit ansvar for å hjelpe til å ta vare på. Me må ta vare på naturen for generasjonen som er no, og alle dei som kjem etter. «Naturen er til låns for komande generasjonar». Og naturen krev ingenting tilbake frå meg. Naturen er ein viktig grunn til at eg busette meg i Masfjorden. Der finn eg sjelero, eg finn meg sjølv igjen etter hektiske kvardagar, og tankane mine kan få strøyme slik dei treng, utan forstyrringar frå anna enn fuglekitter og elvesus. Naturen er for meg eit uvurderleg rekreasjonsområde. Kven er me til å øydeleggja denne naturen som har stått i titusener av år, og kan stå i titusener av år framleis. Korleis kan me bestemma at denne naturen skal bli øydelagd for all framtid? Kven er me til å ta så store avgjersler på naturen sine vegne? Skal ikkje barnebarna våre få den same moglegheita som oss til å nyta naturen sin stillheit og storheit? Å bevega seg i naturen er helsebringande både fysisk og psykisk. Naturen og fjella er for meg mektigare enn noko anna. Ingen pengesum i verda kan overgå den opplevinga som det gjer meg.

Tap av naturareal er ein av dei største klimautfordringane verda står ovanfor i dag, i følgje David Attenborough. Difor vil vindkraftutbygging på land, som er påstått som miljøvennleg og skjuler seg bak «Det grøne skiftet», kanskje ikkje vera så grønt som ein skal ha det til. Då meiner eg at det er betre å byggja ut eksisterande vasskraftverk. Masfjorden kommune har i gjennom dei siste tiåra allereie utbygd fleire elver til kraftverk. Dette er heller vegen å gå.

Under valkampen i haust høyrde me at forskarar har gått ut og sagt at det kan vera lurt å satsa på havvind. Equinor har fått store kontraktar for å laga vindkraft til havs. Så kvifor skal me hasta med å byggja vindkraftutbygging på land, når me veit at ny, og kanskje betre teknologi er på veg? Me har tid til å venta på betre løysingar, betre og billigare teknologi.

Me menneska har eit ansvar for naturen og alt levande. Me har ansvar for å ta vare på den. Og me må ha respekt for den. På eit tidspunkt må me slutta å øydelegga for artsmangfaldet på kloden vår. Og då kan ein ikkje berre fortsetja å byggja ut meir industri.

Eg seier difor eit klart NEI til vindkraft på land, som forriger natur, fauna og økosystem.

Med vennleg helsing

Torhild Andvik